

[Augsburg], 1. März 1566

An Johannes Oporinus

UB Basel, Fr. Gr. I 11, fol. 283r.  
Steinmann Nr. 773.

S. P. D. Caeteris de rebus, per D. Panthaleonem rescripsi: quas literas te ante abitum tuum accepisse confido. Nunc id te oro, quod mea maximè refert, vt rationes nostras de libris superiore anno à me tua fide acceptis, conficias. In quo negocio non mea pecunia, sed fides atque existimatio mea agitur, quae mihi est omni auro atque argento potior. Nihil non modò peto, sed ne opto quidem, praeter id, quod aequum et iustum est. Tantum abest, vt mihi, vel Reipublicae potius Augustanae, vel vnum teruncium abs te remitti aut donari cupiam. Aequa precia librorum et iustas rationes librariorum postulo, sed ita iustas, vt tu mihi promisisti, fore, vt non pluris mihi aestimarentur libri singuli, quàm Bibliopolis vendi isthic solerent. Quod per se etiam aequum est. Si enim fieret aliter, Senatus noster minoris hic Bibliothecam instruere potuisset. Nam sumptus itineris mei et vecturae librorum ad 60 f. accedunt. In rationibus (quas molestissimo labore confeci) si erraui (quod in hoc genere inexercitato facillimè accidit) corrigito, et typographis ex aequo et bono pro me satisfacito. Quicquid vltra 400 f., quos Francofordiae tibi numeraui, debebitur (debebitur autem omnino aliiquid propter eos libros, et quidem non paucos, quorum precia tum ignorabamus) cui iusseris primo quoque tempore numerabo.

Mitto et defectus, quos vt supplendos cures, magnopere oro, et chartas redundantes si cui fortè vsui esse poterunt. Remitto et Ptolemaeum graecum, quem, cum antè sit in bibliotheca nostra, Willerus alijs libris commutare noluit. Ita sordet lingua graeca et philosophia vulgo literatorum. Is liber aestimatus est (nisi fallor) 3. f. Pro quo mitti mihi velim Olai Magni historiam Septentrionalium gentium Romae impressam in folio. Nam Ioannis Magni historiam habeo, quae cum Olao commodè coniungeretur.

Mitti praeterea mihi velim tabulas partitionum grammaticarum Georgij Fabricij: Partitionum dialecticarum Ioannis Sturmij, Partitionum Officiorum Ciceronis Riuij, et Locorum communium Philippi Melanthonis, Nisaei (Partitiones oratorias Sturmij iam habeo) et tabulas postremas Euangeliorum Spangebergij, vt vt τὰ πινακίκὰ coniungerentur.

De alijs libris emendis nihil in mandatis habeo. Vale. Cal[endis] Martij 1566.

Hiero[nymus] Wolfius  
T[uus].

Has literas vasculo Willeri inclusas si serius acceperis, non mirabor. Aliae fortassis per bibliopolas, anteuertent.